

a scavoit que les deux montaignes et l'Isle fussent encloses dedans le circuit des murailles. Les Romains donc transmirent là une colonie soubz Auguste Cesar, a scavoit en l'Isle, laquelle ou bien estoit ruinée de vieillesse, ou avoit perdu sa renommée et la multitude de gens qu'elle avoit auparavant. Or, L. Munatius Plancus fut eleu chef pour conduyre ceste colonie, c'est à dire ces gens qu'on y envoyoit pour habiter, lequel Munatius estoit excellent orateur, et preteur, qui avoit aussi este auditeur de M. Tulles Ciceron, comme Eusèbe le recite. Icelluy mesme Eusebe au livre intitule *De la Raison des temps*, raconte que lorsque Plancus estoit gouverneur de la Gaule, il fait bastir la ville de Lyon, comme aussi il fut conducteur d'une autre colonie nommée Raurique vers Basle, mais de cecy nous en parlerons plus amplement quand nous serons venuz aux Suyses. Plutarque rend bon tesmoignage de ceste colonie amence a Lyon, disant ainsi : Là est maintenant Lyon, ville tres renommee en la Gaule, laquelle longtemps apres Plancus Munatius fait bastir, comme nous l'avons entendu. Ceste ville cy a eu des evesques scavans, et principalement es saintes lettres, lesquelles ont eu grans accroissemens par eux. On a quelques escritz de plusieurs d'entreux, lesquelz montrent assez quels personages c'estoyent. Les plus renommez ce sont Ireneus et Eucherius, qui obtenoyent la primaute en l'Eglise de Gaule, laquelle primaute estoit ordonnee a Lyon. Quant a Eucherius, combien qu'il fut d'un temps barbare et difficile, toutesfois il estoit si elegant en parolles, et avec ce si grave en sentences, qu'il surmontoit tous les autres evesques qui avoyent este devant luy, et qui estoient de son temps. Fauste aussi poëte Lyonnois eut grand bruyt, autant que la condition difficile de son temps le pouvoit porter. »